

四庫全書

子部

欽定四庫全書

春渚紀聞卷四

宋 何遜 撰

雜記

宗威愍政事

宗君汝霖其遇事雖用權智而濟難於談笑之間士大夫多能道之建中靖國間為文登令同年青州教授黃策上書自姑蘇編置文登州遣牙校押赴貶所過縣而黃適感寒疾不能前進牙校督行雖加厚賂祈為一日

之留堅不可得不得已使人致殷勤於公公即具供帳於行館及命醫診候至調理安完而了不知牙校所在密訊其從行者云自至縣即為縣之胥魁約飲於營妓而以次胥史日更主席此校嗜酒而貪色至今不肯出戶屢迫促之乃始同進金兵既至鑾輿南幸兵退以公尹開封初至而物價騰貴至有十倍於前者郡人病之公謂參佐曰此易事自都人率以食飲為先當治其所先則所緩者不憂不平也密使人問米麪之直且市之

計其直與前此太平時初無甚增乃呼庖人取麪令作市肆籠餅大小為之及取糯米一斛令監庫使臣如市酤醞酒各估其值而籠餅枚六錢酒每角七十足出勘市價則餅二十酒二百也公先呼作坊餅師至訊之曰自我為舉子時來往京師今三十年矣籠餅枚七錢而今二十何也豈麥價高倍乎餅師曰自都城經亂以來米麥起落初無定價因襲至此某不能違衆獨減使賤市也公即出兵厨所作餅示之且語之曰此餅與汝所

市重輕一等而我以日下市直會計新麪工直之費校止六錢若市八錢則已有兩錢之息今為將出令止作八錢敢擅增此價而市者罪應處斬且借汝頭以行吾令也即斬以徇明日餅價仍舊亦無敢閉肆者次日呼賈撲正店任修武至訊之曰今都城糯價不增而酒值三倍何也任恐悚以對曰某等開張承業欲罷不能而都城自賊馬已來外居宗室及權貴親屬私釀至多不如是無以輸納官麪之直與工役油燭之費也公曰我

為汝盡禁私釀汝減直百錢亦有利入乎任扣額曰若爾則飲者俱集多中取息足辦輸役之費公熟視久之曰且寄汝頭頸上出率汝曹即換招榜一角止作百錢足不患乎私醞之撓奪也明日出令敢有私造酒麴者捕至不問多寡並行處斬於是傾糟破觚者不勝其數數日之間酒與餅直既並復舊其它物價不令而次第自減既不傷市人而商旅四集兵民懽呼稱為神明之政時杜充守北京號南宗北杜云

膠竊取虎

忻代种氏子弟每會集講武多以奇勝為能一夕步月
庄居有庄戶迎白曰數夕來每有一虎至麥場軟藁間
輒展取快移時而去宜徐往也從者有言請付我一矢
當立斃以獻其一子弟在後笑謂羣從曰我不煩一矢
之遺當以膠竊取之如黏飛雀之易也衆責其誇言曰
請醵錢五千具飯會飲若不如所言我當獨出此錢也
衆許之而還翼晨集庄戶散置膠竊至暮得斗餘盡令

塗場間麥稈上并繫羊以餌之共伺其旁至月色穿林
果有徐行安尾而至者遇繫羊攫而食之意若飽適即
顧麥場轉舒其體數轉之後膠稈叢身牢不可脫至於
尾足頭目矇暗無視體間如被錮束畜性剛烈大不能
堪於是伏地大吼騰躍而起幾至丈許已而屹立不動
久之衆合噪前視之則立死矣

銅章異事

青社土軍高閭耕地得古銅印文曰宣州觀察使印即

謹藏之不以示人後金寇犯闕高統勤王之師屢立戰功遂除察使如印章云每有移文即借用此章又承務郎王淵洛陽人鎖試赴省過黃河灘因憩所乘籃輿渡口輿脚小兀旁拾塊土就支輿而土破中得一銅章視之乃其姓名也

死馬醫

有名士為酒倅者臥病既久其子不慧郡有太醫生楊介名醫也適自都下還衆令其子謁之且約介就居第

診視介亦謙退謂之曰聞尊君服藥且更數醫矣豈小人能盡其藝耶其子曰大人疾勢雖淹久幸左右一顧且作死馬醫也聞者無不絕倒

鹽龍

蕭注從狄殿前之破鹽洞也收其實貨珍異得一龍長尺餘云是鹽龍蠻人所豢也藉以銀盤中置玉盃以玉筋撫海鹽飲之每鱗甲中出鹽如雪則收取用酒送一錢匕專主興陽而前此無說者何也後因蔡元度就其

體舐鹽而龍死其家以鹽封其遺體三數日用亦大有
力後聞此龍歸蔡元長家云

宿生育報

於潛主簿沈存純良字忠老余從兄之壻也初兄之子
許歸內兄黃陞有年矣繼而黃被薦中禮部選以書約
唱第後成禮女一夕得目疾便不分明醫視之云目睛
以破不可療也即以疾報黃乞罷婚而黃云昔許我固
無恙人也我豈以一第而黜育妻哉後竟不敢違其母

兄之命因循告罷女年齒浸長謀與披帶入道不復有
適人之議也然端麗明悟不知者以為無病人也余兄
弟寓居烏墩與忠老遊愛其和易多學忠老諸兄各宦
遊相遠亦欲相依為生願得盲女為家既成婚數日忠
老夢至一官府兩廡皆囚繫人也忠老方顧視之次忽
見有緋衣人昇廳事據案而坐者羣吏庭集聲喏而退
緋衣者遽呼市物之人怒其物不至使杖之其人應言
不順怒益甚亟呼左右取束藁周其身以火薰灼其目

忠老視之忽若微笑者旁一人謂忠老曰子視此不加
惻然更復嬉笑以助其怒心此緋衣人乃子今日之妻
也語竟而覺忠老遽以所夢語盲妻曰異哉冥報之事
不為誣也汝以一怒之熾至以火灼人目遂獲半生無
目之報我以一笑之緣不免今日有盲妻之累且以一
笑一怒之失其報如此况夫妻以樂禍為心而積惡如
陵京者哉豈不為他生之慮耶

馬武復得妻

陶節夫為定帥而本州駐泊都監馬武官期踰年始至
既交割參府公退衙至屏後而侍人高姐者就收袍帶
涕泗交頤公訝而訊之云適參府都監某之本夫也公
愕然問其故乃言馬歷官并相失之詳公領之明日具
酒肴獨約馬將會飲閣中三爵之後徐謂馬曰公之官
之期何為更稽緩爾耶馬離席隕涕曰某去春攜家京
師因與家人輩至大內前觀燈稠人中忽與老妻相失
求訪不獲因循幾年迫於貧乏不免攜孥就祿無它故

也公即呼取大金卮注酒滿中揖馬而笑謂之曰能盡此卮當有好事相聞飲訖語馬曰天下事有出於非意而適然相遇如此賢閣縣君於睽索中適某過澶州得之逆旅間了不言其所自也昨日窺屏見公且語其詳某適已令具兜乘護歸將司矣馬始驚喜次而軍校聲喏云已送駐泊宅眷歸衙訖一郡驚嗟共嘆其異也

僧淨元救海毀人

錢塘楊村法輪寺僧淨元年三十通經祝髮即為禪比

丘遍參明目得法之後歸隱舊廬人不之異也政和癸巳海岸崩毀浸壞民居自仁和之白石至鹽官上管百有餘里朝廷遣道士鎮以鐵符及大築堤防且建神祠以禳禦之毀益不支至紹興癸丑師忽謂衆曰我釋迦文佛歷劫以來救護有情捐棄軀命初無少靳而吾何敢愛此微塵幻妄坐視衆苦而不赴救即起禪定振履經行視海毀最甚處至于蜀山時六月五日也從而觀者數百人而海風激濤噴湧山立師將褰衣而前衆爭

挽引且請偈言以示後來師笑之曰萬法在心底須言
句我不能世俗書亦姑從汝請耳即高舉曰我捨世間
如夢衆人須我作頌頌即語言邊事了取自家真夢又
曰世間人心易了只為人多不曉了即皎在目前未了
千般學道頌畢舉手謝衆踴身沈海衆視驚呼至有頓
足涕流者謂即塋魚腹矣移時風止海波如鏡遙見師
端坐海面如有物拱戴者順流而來直抵崩岸爭前挽
掖而上視師衣履不濡也逮視岸側有數大鯉昂首久

之沈波而去即揚聲謂衆曰自此海毀無患也不旬日
大風漲沙悉還故地蜀山之民深德之即其地營庵居
留事之至紹興乙卯四月八日忽集衆說偈告寂曰會
得祖師真妙訣無得無物又無說喝散烏雲千萬重一
點靈心明皎潔咄安坐而化

受杖准地獄

杭州寶藏寺主藏僧志詮其所得施財無毫髮侵用也
偶寺僧有謂詮曰子所積施貸我十千後當以三千為

息歸子拒之不獲即如數付之數月果以十三千償詮
詮曰三千之息非常住物因以為香燭之費而常蓄一
貓甚馴起居之間未嘗輒相捨也後貓死詮晝夢一官
府有金紫人出迎執禮甚恭如舊相識銓回語之曰弟
子今此何所職掌且於老僧有何緣契而勤勤若此也
金紫人曰某前身有過合受畜身而經為貓償報既盡
以宿性直剛今得為冥官方為貓時蒙師六年愛育之
恩每思有以報効今日台師之來蓋有說也師前受寺

僧貸藏施錢三千之息雖用為佛供利歸一已是亦准盜法當受地獄一劫之苦更作無量功德不可免也詮因求哀金紫人曰某亦當為師叅問此折之報只有於世間受十三杖之苦可代此外無策也語訖夢覺銓即私念曰我幸主藏之久頗為僧俗所敬若一受杖責何面目於叢林也當作苦行以規救免於是盡捨衣鉢為佛供及躬修長懺甚自刻苦歲餘會錢塘縣官攜家累入寺僧適盡赴供無一人迎門者縣官已懷怒心始登

方丈而足為猶糞所污意大憤躁從者徑於懺堂捽志
詮而出云此住持僧也急於却掃故此避匿耳詮亦不
測其由應對不順即呼五百杖之十三而去詮始悟前
夢不復介意而常戒其徒不可以常住之物為已用者
如此云

古道者披胸燃臂

錢塘淨慈寺古道者主供侍病僧寮一日病僧有告之
曰我病少愈念少見血為味汝能為我密致之幸甚至

暮夜袖血餉僧食之美甚一二日復多以金付之再有
所須同寮僧雛窺道者於隙處披其胸取漆盃以利刃
刺心血覆盃其上解衣帶纏遶久之開視盃中血凝矣
即以葱醢依前法製之以進病僧僧雛大駭出以所見
語其徒且告病僧皆大驚異後堂頭闕人府請明老住
持明辭之堅甚至東坡先生以簡督之尚未之許道者
聞之曰須我一行耳時明老出寓北山昭慶寺道者即
以油布裹手及手臂至前禮請曰道者請燃此手以為

和尚導即跪膝然火了不變色燃至手腕明老即命駕從之觀者雲集莫不咨嗟駭異至有流涕者逮至明老安息方丈始稱謝而退燃至半臂矣

花木神井泉監

建安黃正之之兄行之客寄桐廬方臘之亂為賊所害賊平正之素奉天師道即集道侶與邑人啓建黃錄道場追薦殺賊之衆俱有報應而正之特夢其兄告之曰我以罵賊不屈而死上帝見賞已補仙職矣汝無憂也

凡世人至忠至孝及貞廉之士與夫有一善可錄者死有所補授如花木之神井泉之監不可不知也

磨刀勸婦

裴亞卿言為童稚時侍其祖母文安縣君聞語居宣城之日隣有俗子忘其姓名娶婦甚都而悍於事姑每夫外歸必泣訴其凌虐之苦夫常默然一夕於燈下出利刃示其婦婦曰將安用此夫好謂之曰我每見汝訴我以汝姑之不容我與汝持此去之如何婦曰心所願也

夫曰今則未也汝且更與我謹事之一月令汝之勤至而俾姑之虐暴四隣皆知其由然後我與汝可密行其事人各快其死亦不深窮暴死之由也婦如其言於是怡顏柔語晨夕供侍及市珍鮮以進飲饌姑不知其然即前撫接頓加和悅幾致月矣復乘酒取刃玩於燈下其氣憤憤呼其婦語之曰汝姑日來於汝若何曰日來視我非前日比也又一月復扣兩刃問之婦即懼然曰姑今於我情好倍加前日之事慎不可作也再三言之

夫徐握刃怒視之曰汝見世間有夫殺婦者乎曰有之
復見有子殺母者乎曰未聞也夫曰人之生也以孝養
為先父母之恩殺身莫報及長而娶婦正為承奉舅姑
以長子息耳汝歸我家我每察汝恃少容色不能承順
我母乃反令我為此大逆天地神明其容之乎我造此
刃實要斷汝之首以快我母之心姑貸汝兩月使汝改
過怡顏盡為婦之道於我母待汝之心知曲不在母而
安受我刃也其婦戰懼淚如傾雨拜于牀下曰幸恕我

此死我當畢此生前承順汝母常如今日不敢更有少
懈也久之乃許其後婦姑交睦播於親黨有密知此事
者因竊語之聞者皆謂此雖俗子而善於調御轉惡為
良雖士君子有不能處者矣

紫姑大書字

政和二年襄邑民因上元請紫姑神為戲既書紙間其
字徑丈或問之曰汝更能大書否即書曰請連粘襄表
二百幅當為作一福字或曰紙易耳安得許大筆也曰

請用麻皮十斤縛作令徑二尺許墨漿以大器貯備濡染也諸好事因集紙筆就一富人麥場鋪展聚觀神至書云請一人繫筆于項其人不覺身之騰蹕往來場間須臾字成端麗如顏書復取小筆書于紙角云持往宣德門賣錢五百貫文既而縣以妖捕羣集之人大府聞之取就鞠治訖無他狀即具奏知有旨令就後苑再書驗之上皇為幸苑中臨視乃書一慶字與前書福字大小相稱字體亦同上皇大奇之因令於襄邑擇地建祠

歲祀之

夢鱸

吳興溪魚之美冠於他郡而郡人會集必以斫鱸為勤其操刀者名之鱸匠沈忠老言其外祖丁學士君雖湖人而生平不喜食鱸一日忽夢登對已而少休殿廡間傳言以鱸縷一盤為賜食之美甚既覺忽念其味會鄉人有以鮮鯉餉其子者即取具鱸舉筋而盡自後日進一器歲餘復夢登對賜鱸如初食訖而寤但聞腥氣逆

鼻遂不復食至終身云

謔魚

姑蘇李章敏於調戲偶赴隣人小集主人者雖富而素鄙會次章適坐其傍既進饌章視主人之前一煎鮭特大於衆客者章即請於主人曰章與主人俱蘇人也每見人書蘇字不同其魚不知合在左邊者是在右邊者是也主人曰古人作字不拘一體移易從便也章即引手取主人之魚示衆客曰領主人指攜今日左邊之魚

亦合從便移過右邊如何一座輟飯而笑終席乃已

龔正言持鉢巡堂

龔彥和正言自貶所歸衛城縣寓居一禪林日持鉢隨堂供暇日偶過庫司見僧雛具湯餅問其故云具殿院晚間樂食龔自此不復晚食云

繪像答語

毗陵胡門下宗回夫人錢塘關氏女數歲時晨起致敬尊長前而壁間有六妃像家人戲指之曰此亦可致禮

夫人即前斂躬起居忽若卷子有云夫人萬福之應者
左右皆聞驚異既長果歸胡氏卒享暈翟之榮關仲子
云

花月之神

建安章國老之室宜興潘氏女二族稱其韶麗既歸國
老不數歲而卒其終之日室中飛蝶散滿不知其數聞
其始生亦復如此既設靈席每展遺像則一蝶停立久
之而去後遇遠諱之日與曝像之次必有一蝶隨至不

論冬夏也其家疑其為花月之神建安張端公伯玉始
生而鬼哭於家三日而止既死鬼笑于梁至大斂始寂
然蓋其母初禱于郡之黎山王廟夢神指其旁鬼官
與之二家俱余嫻家也得之不誣

施妳婆


湖州烏墩鎮沈氏婢其鄰里呼之施妳婆者年六十餘
髻兩髻明其尚處子也年二十為沈氏婢會大疫主公
主母繼亡獨餘二女子各十數歲無旁親可依為生施

即傭春旁舍或織草屨與縫紉之事得錢以給二女且教護之至於長大擇良為配更為撫抱其子盡力奴事鎮人皆知敬愛之每大家出遊則假守舍餘物滿前一毫不移也至今尚在

孫家尚呂媼

湖州孫略教授家婢名呂媼者服勤孫氏有年矣性謹朴無他能但常日晨起就厨中取食器潔之聚所棄餘粒間有落溝渠者亦拾取淘濯再於釜中或加五味煮

食之未嘗一日廢也年七十餘一日微笑即告其家人
曰為我髡髮著五戒衣我將去矣家人從之因起以左
手結印而化家人遂龕置開元寺中觀者餘月了無穢
氣而髮漸生因與剃之後一月一剃



春渚紀聞卷四

欽定四庫全書

子部

春渚紀聞卷五至七

詳校官中書臣葉元符

員外郎臣牛稔文覆勘

覆校官中書臣汪師曾

校對官中書臣朱所

謄錄監生臣曹勲祖

欽定四庫全書

春渚紀聞卷五

宋 何遜 撰

雜記

張有篆字

吳興張有以小篆名世其用筆簡古得石鼓遺法出文
勛章友直之右所作復古編以正篆隸之本識者嘉之
嘗為余言心字於篆文只是一倒火字耳蓋心火也不
欲炎上非從包也畢少董文簡之孫妙於鼎篆而亦多

見周泰凡有盤盂之銘其論水字云中間一豎更不須
曲只是畫一坎卦耳蓋坎為水見於鼎銘多如此者并
記之

唐子西論文

唐子西言司馬遷敢亂道却好班固不敢亂道却不好
不亂道又好是左傳亂道又不好是唐書八識田中若
有一毫唐書亦為來生種子矣

玉川昌黎月蝕詩

施彥質言玉川子詩極高使稍入法度豈在諸公之下
但韓以詩人見稱故時出狂語聊一驚世耳韓退之有
效玉川子月蝕詩讀之有不可曉者既謂之效乃是玉
川子詩何也亦常聞葉大經云玉川子既作此詩退之
深愛之但恨其太狂因削其不合法度處而取其合者
附於篇其實改之也退之尊敬玉川子不敢謂之改故
但言效之耳

明皇無心治天下

周正夫言人君所論只一宰相唐明皇欲相張嘉貞却忘其名字不知用心向何處又河北皆陷顏真卿獨全平原乃始云朕不謂有此人夫小大一箇顏真卿自不知姓名又顏果卿忠義貫日月後其子不免饑寒不知平日勾當甚事乃知明皇本無心治天下也

古書託名

先君為武學博士日被旨校正武舉孫吳等七書先君言六韜非太公所作內有考證處先以稟司業朱服服

言此書行之已久未易遽廢也又疑李衛公對問亦非是後為徐州教授與陳無已為交代陳云嘗見東坡先生言世傳王氏元經薛氏傳關子明易傳李衛公對問皆阮逸著撰逸嘗以草示奉常公也非獨此世傳龍城記載六丁取易說事樹萱錄載杜陵老李太白諸人賦詩事詩體一律而龍城記乃王銍性之所為樹萱錄劉燾無言自撰也至於書刻亦然小字樂毅論實王著所書李太白醉草則葛叔忱戲欺其婦公者山谷道人嘗

言之矣

畫字行棋

古人作字謂之字畫所謂畫者蓋有用筆深意作字之法要筆直而字圓若作畫則無有不圓勁如錐畫沙者是也不知何時改作寫字寫訓傳則是傳模之謂全失秉筆之意也又奕棋古亦謂之行棋宋文帝使人齎藥賜王景文死時景文與客棋以函置局下神色不變且思行爭劫益棋戰所以為人困者以其行道窮迫耳行

字於棋家亦有深意不知何時改作着棋着如着帽着屐皆訓容也不知於棋者有何干涉也且寫字着棋天下至俗無理之語而并賢愚皆承其說何也

甌酒借書

杜征南與兒書言昔人云借人書一癡還人書一癡山谷借書詩云時送一鴈開鎖魚又云明日還公一癡常疑二字不同因於孫愐唐韻五之字韻中甌字下注云酒器大者一石小者五斗古借書盛酒瓶也又得以證

二字之差然山谷鵠夷字必別見他說當是古人借書必先以酒醴通殷勤借書皆用之耳

定武蘭亭叙刻

定武蘭亭叙石刻世稱善本自石晉之亂契丹自中原輦載寶貨圖書而北至真定德光死漢兵起太原遂棄此石於中山慶厯中土人李學究者得之不以示人韓忠獻之守定武也李生始以墨本獻公堅索之生乃瘞之地中別刻本呈公李死其子乃出石散模售人每本

須錢一千好事者爭取之其後李氏子負官緡無從取
償宋景文公時為定帥乃以公帑金代輸而取石匣藏
庫中非貴遊交舊不可得也熙寧中薛師正出牧其子
紹彭又刻副本易之以歸長安大觀間詔取其石龕置
宣和殿世人不得見也丙午金人南侵與岐陽石鼓復
載而北今不知所在也此語見於續仲永所藏定武蘭
亭後康伯所跋也

鄒張鄧謝後身

邊鎬為謝靈運後身故小字康樂范純夫為鄧仲華後
身故名祖禹張平子後身為蔡伯喈鄒陽後身為東坡
居士即其習氣似皆不誣也

李朱畫得坡仙賞識

李頎字粹老不知何許人少舉進士當得官棄去烏巾
裘為道人遍歷湖湘間晚樂吳中山水之勝遂隱於臨
安大滌洞天往來苕溪之上遇名人勝士必與周旋素
善丹青而間作小詩東坡倅錢塘日粹老以幅絹作春

山橫軸且書一詩其後不通姓名付樵者令俟坡之出
投之坡展視詩畫蓋已奇之矣及問樵者誰遣汝也曰
我負薪出市始經公門有一道人與我百錢令我呈此
實不知何人也坡益驚異之即散問西湖名僧輩云是
粹老久之偶會於湖山僧居相得甚喜坡因和其詩云
詩句對君難出手雲泉勸我早抽身是也粹老畫山筆
力之妙畫物之變而秀潤簡遠非若近世士人畧得其
形似便復輕訾前人自謂超神之妙出於法度之外者

然不能為人特作世所有者絕少得其小屏幅紙以為寶玩也遂家所藏二橫軸一雪山一春晴自兵火已來餘物散盡此二畫幸常在老眼耳又松陵朱象先東坡先生蓋嘗與之叙文云能文而不求舉善畫而不求售者其畫始規摹董北苑與巨然而自出新意筆力高簡潤澤而有生理出許道寧李遠輩之上但其為人既經東坡先生題目之後不肯為人輕作又不為王公大人所屈世所傳者亦不甚多其在嘉興日毛澤民為郡守

於郡城絕景處增廣樓居名月波者日與賓客燕息其上常延致朱象先為作一大屏真近世絕筆但日來賞鑒之家未免徵逐時好未有深知其二人者後遇真賞有損千金而求其一筆者不獲始以余言為不謬也粹老二橫軸續仲永後得之其子承休歸鄭公輔也

精藝同一理

朱象先少時畫筆常恨無前人深遠潤澤之趣一日於鵲溪絹上戲作小山覺不如意急湔去之故墨再三揮

染即有悟見自後作畫多再滌去或以細石磨絹要令墨色着入絹縷者沈珪道人作墨亦嘗因搗和墨蒸去故膠再入新膠及出灰池而墨堅如石遂悟李氏對膠法云

陳涂共為冥吏

晉江陳彥柔言文林郎知縣事孫復為政廉明郡以其才力有餘俾參幕事一日與幕僚會茶獨見一黃衣人授以天符且云當與州之舉子涂楷者同領職迨還家

越夕而卒時紹興十一年五月十二日巳而楷聞孫死之異復夢衣黃紫人羅立庭參云天命名汝職領甚要既覺忻然命筆書壁間云拜伏庭前又一番天書雖捧未容看南陽父作蟠龍卧應為蒼生起謝安明年孫死之日楷無疾而終

天尊賜銀

臨安府天慶觀馬道士言有老道士劉虛靜年七十餘來寓雲安堂旦執爐於天尊像前注香冥禱意甚虔至

觀有小道士伏於暗中默聆其禱乃云虛靜年老羈單
一身常恐一旦數盡身膏草野若蒙上天賜以白金十
星足為身後之備志願足矣小道士乃取白蠟鑄成小
錠俟其夕禱即遙擲其旁虛靜得之驚異伏謝再三不
復細視姑謹藏之語其徒曰人之誠悃常患不至爾雖
天道高遠而聽甚卑無不從人者小道士復欲戲之因
又密求視其所獲請之既數不免示之小道士即懷之
疾走衆中示羣道士相與笑其狂昧久之不至虛靜從

而執之且熟視其物曰此白蠟耳非我所獲者喧譁不置必欲訟之官府小道士家素饒於財衆道士勸諭之曰汝若致訟則所費不止此不若如數償之遂真有所獲雖虛靜一時非意之禱而造物者宛曲取付益亦巧矣

撞鐘畫像作追薦

余仲兄馬氏嫂之母符離高氏女年二十以產乳歿其父朝議君念之深切夜夢女告之曰無他作冥助第呼

畫人狀我并令像與我身等召鄰僧使糊鐘間祝撞鐘人及多許之金令晨昏聲鐘時呼我名氏而懺祝之俟此像忽自脫落了無損動即我超生時也朝議君曉起語家人為呼畫人及召寺僧如其言委之不數月忽夢女銖衣寶冠稱盛功德今當生樂處矣泣謝而去夢覺未及語而寺僧扣門以脫像為示果無少損處云

張山人謔

紹聖間朝廷貶責元祐大臣及禁毀元祐學術文字有

言司馬溫公神道碑乃蘇軾撰述合行除毀於是州牒
巡尉毀折碑樓及碎碑張山人聞之曰不須如此行遣
只消令山人帶一箇玉冊官去碑額上添鐫兩箇不合
字便了也碑額本云忠清粹德之碑云

酒謔

宗室趙子正監永靜軍耽酒嗜書札而喜人奉已有過
客執觚而前正遇趙於案間揮翰自得客自旁視再三
而歎美其妙趙舉首視之曰汝亦知書耶客曰小人亦

嘗留心字畫竊觀太保之書雖王右軍復有不及者趙
詬之曰汝玩我耶曰某嘗觀法書云王書一字入木八
分今太保之書一落筆則入水十分豈不為過於右軍
耶坐人皆賞其機中為之絕倒趙亦笑而遣之

木中有字

三衢毛氏庭中一木忽中裂而紋成衍字如以濃墨書
染者體作顏平原書會其子始生因以名之後衍登進
士第官至龍圖閣而終又晉江尤氏其鄰朱氏圃中有

柿木高出屋上一夕雷震中裂木身亦若以濃墨書尤
家二字連屬而上不知其數至於木枝細者破視亦隨
枝之大小成字尤氏乞得其本作數百段分遺好事字
體帶草勁健如王會稽書朱氏後以其圃歸尤氏云

隴州鸚歌

王景源云有韓奉議者為隴州通守家人得鸚歌忽語
家人曰鸚歌數日來甚思量鄉地若得放鸚歌一往即
生死無忘也家人聞其語甚憐之即謂之曰我放你甚

易此去隴州數千里外你怎生歸得曰鸚歌亦自記得
來時驛程道路日中且去深林中藏身以避鷹鷂之擊
夜則飛行求食以止饑渴爾家人即啓籠及與解所繫
縋線且祝其好去鸚歌亦低首答曰娘子憊更各自好
將息莫憶鸚歌也遂振翼望西而去家人輩亦悵然者
久之謂必無遠達之理至數月舊任有經使何忠者自
隴州差至京師投下文字始出州城因憇一木下忽聞
木杪有呼急足者忠愕然謂是鬼物呼之再三不免仰

首視之即有鸚歌且顧忠曰你記得我否我便是韓通判家所養鸚歌也你到京師切記為我傳語通判宅眷鸚歌已歸到鄉地甚快活深謝見放也忠咨嗟而行至都遂至韓第問鸚歌所在具言其所見舉家驚異且念其慧黠及能偵候何忠傳達其言為可念者或未以為信余曰昔唐太宗時林邑獻五色鸚歌新羅獻美女二人魏鄭公以為不宜受太宗喜曰林邑鸚歌猶能自言苦寒思歸況二女之遠別親戚乎并鸚歌各付使者歸

之又明皇時太真妃得白鸚鵡聰慧可愛妃每有燕遊必置之輦竿自隨一日鸚鵡忽低首愁慘太真呼問之云鸚鵡夜夢甚惡恐不免一死已而太真妃出後苑有飛鷹就輦攫之而去宮人多於金花紙上寫心經追薦之者此又能通曉夢事則其靈慧非止一鸚鵡歌也

野駝飲水形

先君嘗見蔡元度言其父死委術者王壽昌於餘杭尋視墓地數日不至蔡因夢至一官府有紫衣人據案而

坐望蔡之入遙語謂曰汝尋墓地已得之否野駝飲水形是也覺而異之適壽昌至問其所得云有一地在臨平山勢聳遠於某術中佳城也但恐觀者未誠吾言耳元度云姑言山形可也王云一大山巍然下臨浙江即野駝飲水形也元度曰無復他求神先告我矣即用之

春渚紀聞卷五

欽定四庫全書

春渚紀聞卷六

宋 何遠 撰

東坡事實

文章快意

先生嘗謂劉景文與先子曰某平生無快意事惟作文
章意之所到則筆力曲折無不盡意自謂世間樂事無
踰此者

後山往杏園

建中靖國元年陳無已以正字入館未幾得疾樓異世
可時為登封令夜夢無已見別行李匆甚樓問是行何
之曰暫往杏園東坡少游諸人在彼已久樓起視事而
得叅寥子報云無已逝矣

坡仙之終

冰華居士錢濟明丈嘗跋施能叟藏先生帖後云建中
靖國元年先生以玉局還自嶺海四月自當塗寄十一
詩且約同程德孺至金山相候既往迂之遂決議為毘

陵之居六月自儀真避疾臨江再見於奔牛埭先生獨
卧榻上徐起謂某曰萬里生還乃以後事相託也惟吾
子由自再貶及歸不復一見而決此痛難堪餘無言者
久之復曰某前在海外了得易書論語三書今盡以付
子願勿以示人三十年後會有知者因取藏篋欲開而
鑰失匙某曰某獲侍言方自此始何遽及是也即遷寓
孫氏館日往造見見必移時慨然追論往事且及人間
出嶺海詩文相示時發一笑覺眉宇間秀爽之氣照映

坐人七月十二日疾少間曰今日有意喜近筆研試為
濟明戲書數紙遂書惠州江月五詩明日又得跋桂酒
頌自爾疾稍增至十五日而終

鄒陽十三世

遠一日謁冰華丈於其所居烟雨堂語次偶誦人祭先
生文至降鄒陽於十三世天豈偶然繼孟軻於五百年
吾無間也之句冰華笑曰此老夫所為者因請降鄒陽
事冰華云元祐初劉貢甫夢至一官府案間文軸甚多

偶取一軸展視云在宋為蘇某逆數而上十三世云在西漢為鄒陽蓋如黃帝時為火師周朝為柱下史只一老聃也

紫府押衙

雪川莫蒙養正崇寧間過余言夜夢行西湖上見一人野服髻髻頎然而長參從數人軒軒然常在人前路人或指之而言曰此蘇翰林也養正少識之亟趨前拜且致恭曰蒙自為兒時誦先生之文願執巾侍不可得也

不知先生厭世仙去今何所領而參從如是也先生顧視久之曰是太學生莫蒙否養正對之曰然先生領之曰某今為紫府押衙語訖而覺後偶得先生嶺外手書一紙云夜登合江樓夢韓魏公騎鶴相過云受命與公同北歸中原當不久也已而果然小說載魏公為紫府真人則養正之夢不誣矣

裕陵睠賢士

先生臨錢塘郡日先君以武學博士出為徐州學官待

次姑蘇公遣舟邀取至郡留款數日約同劉景文泛舟
西湖酒酣顧視湖山意頗歡適且語及先君被遇裕陵
之初而歎今日之除似是左遷久之復謂景文曰如某
今日餘生亦皆裕陵之賜也景文請其說云某初逮繫
御史獄獄具奏上是夕昏鼓既畢某方就寢忽見二人
排闥而入投篋于地即枕卧之至四鼓某睡中覺有撼
體而連語云學士賀喜者某徐轉反問之即曰安心熟
寢乃挈篋而出蓋初奏上舒亶之徒力詆上前必欲置

之死地而裕陵初無深罪之意密遣小黃門至獄中視
其起居狀適某晝寢鼻息如雷即馳以聞裕陵顧謂左
右曰朕知蘇軾胸中無事者於是即有黃州之命則裕
陵之恕念臣子之心何以補報萬一後先君嘗以前事
語張嘉父嘉父云公自黃移汝州謝表既上裕陵覽之
顧謂侍臣曰蘇軾真奇才時有憾公者復前奏曰觀軾
表中猶有怨望之語裕陵愕然曰何謂也對曰其言兄
弟並列於賢科與驚寃未定夢遊縲紲之中之語蓋言

軾轍皆前應直言極諫之詔今乃以詩詞被譴誠非其
闕原也裕陵徐謂之曰朕已灼知蘇軾衷心實無他腸也
於是語塞云

墨木竹石

先生戲筆所作枯株竹石雖出一時取適而絕去古今
畫格自我作古遠家所藏枯木并拳石叢篠二紙連手
帖一幅乃是在黃州與章質夫莊敏公者帖云某近者
百事廢懶唯作墨木頗精奉寄一紙思我當一展觀也

後又書云本只作墨水餘興未已更作竹石一紙同往
前者未有此體也是公亦欲使後人知之耳

裕陵惜人才

公在黃州都下忽盛傳公病歿裕陵以問蒲宗孟宗孟
奏曰日來外間似有此語然亦未知的實裕陵將進食
因歎息再三曰才難遂輟飯而起意甚不懌後公於哲
廟朝表薦先子博士備論云先皇帝道配周孔言成典
謨蓋嘗當食不御有才難之歎其說蓋出于此

著述詳攷故實

秦少章言公嘗言觀書之樂夜常以三鼓為率雖大醉歸亦必披展至倦而寢然自出詔獄之後不復觀一字矣某於錢塘從公學二年未嘗見公特觀一書也然每有賦詠及著議所用故實雖目前爛爛熟事必令秦與叔黨諸人檢視而後出

書明光詞

蔣子有家藏先生於吳牋上手書一詞是為餘杭通守

時字云紅杏子天桃盡獨自占春芳不比人間蘭麝自然透骨生香對酒莫相忘似佳人兼合明光只憂長笛吹花落除是寧王既不知曲名常以問先生門下士及伯達與仲虎叔平諸孫皆云未之見也又不知兼合明光是何等事或云是醑醑也

論古文俚語二說

文章至東漢始陵夷至晉宋間句為一段字作一處其源出於崔蔡史載文姬兩詩特為俊偉非獨為婦人之

奇乃伯喈所不逮也又俚俗語有可取者處貧賤易耐
富貴難安勞苦易安閑散難忍痛易忍癢難人能安閑
散耐富貴忍癢真有道之士也二段所書皆東坡醉墨
遂家寶之甚久後入御府世無傳此語者故錄于此

題領巾裙帶二絕

嘉興李巨山錢安道尚書甥也先生嘗過安道小酌其
女數歲以領巾乞詩公即書絕句云臨池妙墨出元常
弄玉嬌癡笑柳娘吟雪屢曾驚太傅斷弦何必試中郎

又於陶安世家見為劉唐年君佐小女裙帶上作散隸
書絕句云任從酒滿翻香縷不願書來繫綵牋半接西
湖橫綠草雙垂南浦拂紅蓮每句皆用一事尤可珍寶
也

營妓比海棠絕句

先生在黃日每有燕集醉墨淋漓不惜與人至於營妓
供侍扇書帶畫亦時有之有李琪者小慧而頗知書札
坡亦每顧之喜終未嘗獲公之賜至公移汝郡將祖行

酒酣奉觴再拜取領巾乞書公顧視之久令琪磨硯墨
濃取筆大書云東坡七歲黃州住何事無言及李琪即
擲筆袖手與客笑談坐客相謂語似凡易又不終篇何
也至將徹具琪復拜請坡大笑曰幾忘出場繼書云恰
似西川杜工部海棠雖好不留詩一座擊節盡醉而散
太白胸次

士之所尚忠義氣節不以摘詞摘句為勝唐室宦官用
事呼吸之間殺生隨之李太白以天挺之才自結明王

意有所疾殺身不顧王舒公言太白人品污下詩中十句九句說婦人與酒至先生作太白贊則云開元有道為少留縻之不可矧肯求又平生不識高將軍手污吾足乃敢嗔二公立論正似見二公胸次也

賦詩聯詠四姬

徐黃州之子叔廣十四秀才先生與其舅張仲謨書所謂十三十四者皆俊性者是也嘗出先生醉墨一軸字畫歌傾龍蛇飛動乃是張無盡過黃州而黃州有四侍

人適張夫人攜其一佳壻家為浴兒之會無盡因戲語
云厥有美妾良由令妻公即續之為小賦云道得微草
鄭趙姓稱孫姜閻齊浴兒於玉潤之家一變足矣侍坐
於冰清之仄三英粲兮既暮而張夫人復還其一還乃
閻姬也最為徐所寵公復書絕句云玉筍纖纖揭繡簾
一心偷看綠羅尖使君三尺毬頭帽須信從來只有簷

樂語畫隸三絕

遂於揚州得先生手畫一樂工復作樂語云桃園未必

無杏銀鑛終須有鉛汞帶豈能攔浪藕花却解留蓮其
後文作漢隸書子瞻禹功同觀真三絕也

秦蘇相遇自述輓誌

先生自惠移儋耳秦七丈少遊亦自郴陽移海康渡海
相遇二公共語恐下石者更啓後命少遊因出自作挽
詞呈公公撫其背曰某常憂少遊復何言某亦嘗自為
誌墓文封付從者不使過子知也遂相與嘯詠而別初
少遊謁公彭門和詩有更約後期遊汗漫蓋識於此云

牛酒帖

先生在東坡每有勝集酒後戲書以娛坐客見於傳錄者多矣獨畢少董所藏一帖醉墨瀾翻而語特有味云今日與數客飲酒而純臣適至秋熱未已而酒白色此何等酒也入腹無臧任見大王既與純臣飲無以侑酒西隣耕牛適病足乃以為肉飲既醉遂從東坡之東直之出至春草亭而歸時已三鼓矣所謂春草亭乃在郡城之外是與客飲私酒殺耕牛醉酒踰城犯夜而歸又

不知純臣者是何人豈亦應不當與往還人也

饋藥染翰

先生自海外還至贛上寓居水南日過郡城携一藥囊遇有疾者必為發藥并疏方示之每至寺觀好事者及僧道之流有欲得公墨妙者必預探公行遊之所多設佳紙於紙尾書記名氏堆積案間拱立以俟公見即笑視略無所問縱筆揮染隨紙付人至紙尚多即笑語之曰日暮矣恐小書不能竟紙或欲齎名及佛偈幸見語

也及歸人人厭滿忻躍而散

寫畫白團扇

先生臨錢塘日有陳訢負綾絹錢二萬不償者公呼至
詢之云某家以製扇為業適父死而又自今春已來連
雨天寒所製不售非固負之也公熟視久之曰姑取汝
所製扇來吾當為汝發市也湏臾扇至公取白團夾絹
二十扇就判筆作行書草聖及枯木竹石頃刻而盡即
以付之曰出外速償所負也其人抱扇泣謝而出始踰

府門而好事者爭以千錢取一扇所持立盡後至而不得者至懊恨不勝而去遂盡償所逋一郡稱嗟至有泣下者

寺認法屬黑子如星

錢塘西湖壽星寺老僧則廉言先生作郡倖日始與參寥子同登方丈即顧謂參寥曰某生平未嘗至此而眼界所視皆若素所經歷者自此上至懺堂當有九十二級遣人數之果如其言即謂參寥子曰某前身山中僧

也今日寺僧皆吾法屬耳後每至寺即解衣盤礴久而始去則廉時為僧雖侍不每暑月袒露竹陰間細視公背有黑子若星斗狀世人不得見也即北山君謂顏魯公曰誌金骨記名仙籍是也

觀書用意

唐子西云先生赴定武時過京師館於城外一國子中余時年十八謁之問近觀甚對以方讀晉書猝問其中
有甚亭子名予茫然失對始悟前輩觀書用意如此

筆下變化

晁丈无咎言蘇公少時手抄經史皆一通每一書成輒變一體卒之學成而已廼知筆下變化皆自端楷中來爾不端其本而欺以求售吾知書中孟嘉自可點識也

馬蹶答問

元祐三年北人賀正使劉霄等入賀公與狄詠館伴錫燕回始行馬而公馬小蹶劉即前訊曰馬驚無苦否公應之曰銜勒在御雖小失無傷也

蘇劉互諠

劉貢父舍人滑稽辨捷為近世之冠晚年雖得大風惡疾而秉機決發亦不能忍也一日與先生擁爐於慧林僧寮謂坡曰吾之隣人有一子稍長因使之代掌小解不逾歲偶誤質盜物資本耗折殆盡其子媿之引乃罪而請其父曰某拙於運財以敗成業今請從師讀書勉赴科舉庶幾可成以雪前恥也其父大喜即擇日具酒肴以遣之既別且囑之曰吾老矣所恃以為窮年之養

者子也今子去我而遊學儻或僥倖改門換戶吾之大幸也然切有一事不可不記或有交友與汝唱和須子細看莫更和却賊詩狼狽而歸也蓋譏先生前逮詔獄如王晉卿周開祖之徒皆以和詩為累也貢父語始絕口先生即謂之曰某聞昔夫子自衛反魯會有召夫子食者既出而羣弟子相與語曰魯吾父母之邦也我曹人從夫子轍環四方今幸俱還鄉里能乘夫子之出相從尋訪親舊因之閱市否衆忻然許之始過闕闕未及

縱觀而稠人中望見夫子巍然而來於是惶懼相告由
夏之徒奔蹕越逸無一留者獨顏子拘謹不能遽為闊
步顧市中石塔似可隱蔽即屏伏其旁以俟夫子之過
已而羣弟子因目之為避孔子塔貢父風疾之劇以報
之也

回江之利

先生元祐四年以內相出典餘杭時水官侯臨亦繼出
守上饒過郡以嘗渡江敗舟於浮山遂畫回江之利以

獻從公相視其宜一自富陽新橋港至小嶺開鑿以通
閑林港或費用不給則置山不鑿而令往來之舟般運
度嶺由餘杭女兒橋港至郡北關江漲橋以通運河一
自龍山閘而出循江道過六和寺由南蕩朱橋港開石
門平田至廟山然後復出江道二十里至富陽而公詩
有坐陳三策本人謀唯留一諾待我畫謂此又云石門
之後萬金耳首鼠不為吾已隘又云上饒使君更超逸
坐晚浮山如累塊者知所議出於侯也時越尼身死官

籍其資得錢二十萬緡公乞於朝又請度牒三百道佐用得請而公入為翰林承旨除林希子中為代有諛者言今鑿龍山姥嶺正犯太守身因寢其議而遷用亡尼之資遺患至今往來者惜之

翰墨之富

先生翰墨之妙既經崇寧大觀焚毀之餘人間所藏蓋一二數也至宣和間內府復加搜訪一紙定直萬錢而梁師成以三百千取吾族人英州石橋銘譚積以五萬

錢輟沈元弼月林堂榜名三字至於幽人釋子所藏寸
紙皆為利誘盡歸諸貴近及大卷軸輸積天上丙午年
金人犯闕輪運而往疑南州無一字之餘也而紹興之
初余於中貴任源家見其所藏幾三百軸最佳者有徑
寸字書宸奎閣記行書南遷乞乘舟表與酒子賦又於
先生諸孫處見海外五賦字皆如醉翁亭記而加老放
畢少董處見自北中還得責呂惠卿詞於王信仲家人
針篋中續仲永處見海外祭妹德化縣君文與余世寶

東坡先生無一錢詩醉草十紙龍蛇飛動皆非前後石刻所見者則德麟趙丈嘗跋公書後有翰墨稽天發乎妙定之語為不虛也

龍團稱屈賦

先生一日與魯直文潛諸人會飯既食骨殖兒血羹客有湏薄茶者因就取所碾龍團遍啜坐人或曰使龍茶能言當湏稱屈先生撫掌久之曰是亦可為一題因援筆戲作律賦一首以俾薦血羹龍團稱屈為韵山谷擊

節稱詠不能已已無藏本聞關子開能誦今亡矣惜哉

賡換真書

先生元祐間出帥錢塘視事之初都商稅務押到匿稅人南劍州鄉貢進士吳味道以二巨掩作公名銜封至京師蘇侍郎宅顯見偽妄公即呼味道前訊問其掩中果何物也味道蹙而前曰味道今秋忝冒鄉薦鄉人集錢為赴省之贐以百千就置建陽小紗得二百端因計道路所經場務盡行抽稅則至都下不存其半心竊計

之當今負天下重名而愛獎士類唯內翰與侍郎耳縱
有敗露必能情貸味道遜偽假先生台銜緘封而來不
探知先生已臨鎮此邦罪實難逃幸先生恕之公熟視
笑呼掌牋奏書史公令去舊封換題細銜附至東京竹
竿巷蘇侍郎宅并手原缺一字子由書一紙付示謂味道曰
先輩這回將上天去也無妨來年高過當却惠顧也味
道悚謝再三次年果登高第還具牋啓謝殷勤其語亦
多警策公甚喜為延款數日而去

春渚紀聞卷六

欽定四庫全書

春渚紀聞卷七

宋 何遜 撰

詩詞事略

牧之詩誤

十洲記載鳳麟洲上多麟鳳人取鳳味及麟角合煎為膠號集弦膠又名連金泥漢武帝時西國王使至獻膠四兩嘗於上續絃者是也而杜牧之詩有天上鳳凰難得髓何人解合續絃膠恐髓字誤然髓亦安可為膠也

冬瓜堰誤

雲溪友議載酒徒朱冲嘲張祐云白在東都元已薨鸞
臺鳳閣少人登冬瓜堰下逢張祐牛矢灘邊說我能以
祐時為堰官也按承吉以處士自高諸侯府爭相辟召
性狷介不容物輒自劾去豈肯屈就堰官之辱耶金華
子雜說云祐死子虔望亦有詩名嘗求濟於嘉興裴弘
慶署之冬瓜堰官虔望不服弘慶曰祐子守冬瓜已過
分矣此說似有理也

作文不憚屢改

自昔詞人琢磨之苦至有一字窮歲月十年成一賦者
白樂天詩詞疑皆銜口而成及見今人所藏遺藁塗竄
甚多歐陽文忠公作文既畢貼之牆壁坐卧觀之改正
盡善方出以示人遂嘗於文忠公諸孫望之處得東坡
先生數詩藁其和歐叔弼詩云淵明為小邑繼圈去為
字改作求字又連塗小邑二字作縣令字凡二改乃成
今句至胡椒鉢兩多安用八百斛初云胡椒亦安用乃

貯八百斛若如初語未免後人疵議又知雖大手筆不以一時筆快為定而憚於屢改也

司馬才仲遇蘇小

司馬才仲初在洛下晝寢夢一美姝牽帷而歌曰妾本錢塘江上佳花落花開不管流年度燕子銜將春色去紗牕幾陣黃梅雨才仲愛其詞因詢曲名云是黃金縷且白後日相見於錢塘江上及才仲以東坡先生薦應制舉中等遂為錢塘幕官其解舍後唐蘇小墓在焉時

秦少章為錢塘尉為續其詞後云斜插犀梳雲半吐檀
板輕籠唱徹黃金縷夢斷彩雲無覓處夜涼明月生春
渚不踰年而才仲得疾所乘畫水輿舫泊河塘柁工遽
見才仲携一麗人登舟即前聲喏繼而火起舟尾狼忙
走報家已慟哭矣

劉景文夢代晉文公

東坡先生稱劉景文博學能詩凜凜有英氣如三國陳
元龍之流元祐五年坡守錢塘景文為東南將領佐公

開治西湖日由萬松嶺以至新堤坡在潁州和景文詩
有萬松嶺上黃千葉載酒年年踏松雪劉郎去後誰復
來花下有人愁斷絕謂此後坡薦景文得隰州以歿景
文晚歲常夢與晉文公神友夢中酬唱甚多家有編錄
既至隰州三日謁神祠出東城所歷之地及拜瞻神像
曉然夢中往還文公及每至所在也一日夢文公云已
受帝旨得景文為代月餘景文得疾郡人有宿郊外者
見郡守嚴衛而入文公祠中凌晨趨府公已屬纊矣

趙德麟跋太白帖

雖自九天分派不與萬李同林步處雷驚電繞空餘翰
墨窺尋此趙德麟跋遂所藏李太白醉草後其實自謂
也

暨氏女野花詩

建安暨氏女子十歲能詩人今賦野花詩云多情樵牧
頻簪髻無主蜂鶯任宿房觀者雖加驚賞而知其後不
保真素竟更數夫流落而終

王子直誤疵坡詩

王子直詩話云東坡先生作程筠歸真亭詩有會看千
字誅木杪見龜趺龜趺是碑座不應見於木杪指以為
病初不知亭在山半自下望碑則龜趺正在木杪豈真
在木上耶杜子美北征詩云我往已水濱我僕猶木末
豈亦子美之僕留挂木末如猿猱耶

泖茆字異

松陵唱和詩陸魯望賦吳中事云三茆涼波魚鮓動五

茸春草雉媒嬌注稱遠祖士衡載泖從水而此乃從草
五茸吳王獵所又有陸機茸皆豐草所在今觀所謂三
泖皆漫水巨浸春夏則荷蒲演迤水風生涼秋冬則葭
葦藪蔚魚嶼相望初無江湖淒凜之色所謂冬暖夏涼
者正盡其美哉謂泖是水死絕處故江左人目水之停
滯不流者為泖不知笠澤何獨從草必有所據也

穿雲裂石聲

東坡先生和崗字詩云一聲吹裂翠崖崗遠家藏公壘

本詩後注云昔有善笛者能為穿雲裂石之聲別不用事也

月食詩指董秦乃二人

玉川子月食詩官爵秦董恐指董偃秦宮也

徐氏父子俊偉

東坡帥杭日與徐璠全父坐雙檣堂公指二檣曰二跖辭漢去璠應聲云大老入周來公為擊節久之璠之子端崇字崇之少時俊偉落筆千字有人得山谷道人清

江詞示之者崇之曰山谷當今作者所知漁父止此耶
或詩為賦援筆立就其末魯邦司寇陳義高三閭大夫
心徒勞相逢一笑無言說去宿蘆花又明月識者奇之
政和間余過禦兒訪其隱居坐定為余曰數夕頗為飛
蚊所擾夜不能寐因得一絕句云空堂夜合勢如雲滿
壑寧知過去身滿腹經營盡膏血那知通夕不眠人時
蔡京當國方引用小人布列要近賦外橫歛以供花石
之費天下之民殆不聊生而無敢形言者崇之託以規

金史四庫全書
卷七
諷云

關氏伯仲詩深妙

鐘聲互起東西寺燈火遙分遠近村此余友關子東西
湖夜歸所作非身到西湖不知此語形容之妙也關氏
詩律精深妍妙世守家法子東二兄子容子開皆稱作
者野艇歸時蒲葉雨縹車鳴處棟花風江南舊日經行
地盡在于今醉夢中又手官官小未朝叅紅日半竿春
睡酣為報隣雞莫驚起且容歸夢到江南此子容詩也

世傳以為東坡先生所作非也

雞人唱曉夢聯詩

建安郭周孚未第時夢人以詩一聯示之云雞人唱曉
沉潛際漢殿傳聲彷彿聞郭於夢中口占續之云自慶
寒儒千載遇夢魂先得覲天顏繼於余中榜登甲科初
與同袍伏闕以待唱第忽聞宮闕間有連聲長歌了不
成詞調不覺問其旁坐有應之者曰此所謂雞人唱曉
也郭欣然悟前詩之先定後恬於仕進官至員郎所至

以清慎稱之

夢讀異詩

莫養正崇寧初在都下夢人持數詩相視內一篇語皆
剗剗不可解既醒獨憶兩聯云火輪方擊轂風劍已飛
鋸諸天互魔擾救護世尊忙不知何謂也

熙陵獎拔郭贄

先友郭照為京東憲日嘗為先生言其曾大父中令公
贄初為布衣時肄業京師皇建院一日方與僧對奕外

傳南衙大王至以太宗龍潛日嘗判開封府故有南衙之稱忘收棋局太宗從容問所與棋者僧以郭對太宗命召至郭不敢隱即前拜謁太宗見郭進趨詳雅襟度朴遠屬意再三因詢其行卷適有詩軸在案間即取以跪呈首篇有觀草書詩云高低草木芳爭發多少龍蛇眼未開太宗大加稱賞蓋有合聖意者即載以後乘歸府第命章聖出拜之不閱月而太宗登極遂以隨龍恩命官爾後眷遇益隆不十數年位登公輔蓋與孟襄陽

賈長江不侔矣

顏幾聖索酒友詩

錢塘顏幾字幾聖俊偉不羈性復嗜酒無日不飲東坡先生臨郡日適當秋賦幾於場中潛代一豪子劉生者遂魁送舉子致訟下幾吏久不得飲密以一詩付獄吏送外間酒友云龜不靈身禍有胎刀從林甫笑中來憂惶囚繫二十日辜負醺酣三百盃病鶴雖甘低羽翼罪龍尤欲望風雷諸豪俱是知心友誰遣尊壘向北開吏

以呈坡坡因緩其獄至會赦得免後數年一日醉卧西湖寺中起題壁間云白日尊中短青山枕上高不數日而終

米元章遭遇

米元章為書學博士一日上幸後苑春物韶美儀衛嚴整遽召芾至出烏絲欄一軸宣語曰知卿能大書為朕竟此軸芾拜舞訖即解袖詆筆伸卷神韻可觀大書二十言以進曰目眩九光開雲蒸步起雷不知天近遠親

見玉皇來上大喜錫賚甚渥又一日上與蔡京論書艮
岳復召芾至令書一大屏顧左右宣取筆研而上指御
案間端研使就用之芾書成即捧研跪請曰此研經賜
臣芾濡染不堪復以進御取進止上大笑因以賜之芾
躡舞以謝即抱負趨出餘墨霑袍袖而喜見顏色上
顧蔡京曰顛名不虛傳也京奏曰芾人品誠高所謂不
可無一不可有二者也

何張遺句南金錄

遂仲兄邁字子薦兒時嘗過僧居賦藏筠軒詩云不使
翠分旁牖去却緣清甚畏人知踰冠而卒與友人張圖
南伯鵬者俱寓居餘杭又姻家也伯鵬亦不幸早世伯
鵬嘗與余分韻賦詩繼有一詩督余所作云坐中病競
分明久驢上敲推兀未裁用事精穩如老作者惜乎造
物者不少假之年以觀其所止也余嘗集二人遺句名
之曰南金錄且為之跋云方二人為童子時已有星心
月脇中語驚動老成逮其知學復觀其所以因材自勵

金定四庫全書
卷七
期於至遠者亦若王良造父秣驥驟而問途是心豈在
夫較縈策之妙於蟻封之間而已哉不幸短命百不一
施所可表見於後獨此編耳覽者不以為過言

李媛步伍亭詩

遠兄子碩送客餘杭步伍亭就觀壁後得淡墨書字數
行彷彿可辨筆迹道媚如出女手云夜臺夜復夜東山
東復東當時九龍月今日白楊風後題云李媛書詳味
詩句似非世人所作亭後荒閑有數十塚疑塚間鬼憑

附而書不然好事者為鬼語耳

漁父詩答范希文

關子東云范希文嘗於江山見一漁父意其隱者也問姓名不對留詩一絕而去獨記其兩句云十年江上無人問兩手今朝一度叉

王林梅詩相類

王舒公嘗賦梅花詩云須裊黃金危欲墜蒂團紅蠟巧能粧與林和靖所賦一聯極相似林云蕊訝粉綃裁太

碎蒂凝紅蠟綴初乾或謂移林上句合王下句似為全勝

蘇黃秦書名有僻

東坡先生山谷道人秦太虛七丈每為人乞書酒酣筆倦坡則多作枯木拳石以塞人意山谷則書禪句秦七丈則書鬼詩余家收山谷所書禪句三十餘首有云牽驢飲江水鼻吹波浪起岸上蹄踏蹄水中嘴對嘴予自釣魚船上客偶除鬚髯著袈裟佛祖位中留不住夜來

依舊宿蘆花此二詩人間計有數十百紙矣百花橋下
木蘭舟破月衝烟任意流金玉蒲堂何所戀爭如年少
去來休又溘爾一氣散去託萬鬼隣四大不自保況復
滿堂親膏血汗厚土化作丘中塵空牀橫白骨奄忽千
歲人秦七丈屢書此二詩余所藏大字小字各有二本

罵胥詩對

福唐張道人多與人言偈語人禍福如徐神公言法華
既過無不神驗者然亦時有戲劇警動小人者郡有胥

魁其性剛悍素為郡人所惡偶以年勞出職既府謝而出躍馬還家道逢道人衝突而過既內不自安下馬挽張且求偈言張於茶肆取紙大書與之曰畜生騎畜生兩箇不相爭坐者只管坐行者只管行脊覽之大慙而退余兒時嘗聞魏處士隱居陝府有孔目官姓王者好為惡詩嘗至東郊舉示魏及言其精於屬對魏甚苦之而不能却也一日忽有數客訪魏而王至云某夜得一聯似極難對能對者當輸一飯會衆請其句云籠牀不

是籠牀蚊厨乃是籠牀方竊自稱奇而魏即應聲曰我
有對矣可以孔目不是孔目驢紂乃是孔目一座稱快
王即拂袖而出終身不至草堂也蓋小人僭妄不可堪
忍雖大修行人與大雅君子箭在機上不得不發也

陸規七歲題詩

陸農師左丞之父少師公規生七歲不能言一日忽書
壁間云昔年曾住海三山日月宮中數往還無事引他
天女笑謫來為吏向人間自此能言語後登進士第官

金史卷之七
至卿監壽八十而終

辨月中影

王荊公言月中彷彿有物乃山河影也至東坡先生亦有正如大圓鏡寫此山河影妄言桂兔幕俗說皆可屏之句以二先生窮理盡性固當無可議者然尚有未盡解處今以半鏡懸照物像則全而見之月未滿則中之物像亦只半見何也

兔有雄雌

東坡先生云中秋月明則是秋必多兔野人或言兔無
雄者望月而孕信斯言則木蘭詩云雌兔眼迷離雄兔
脚撲握何也先生徑山詩有煖足惟撲握若雄兔在月
則徑山正公又非得而煖足也

詩句七十二取義

玉臺詩入門時左顧但見雙鴛鴦鴛鴦七十二羅列自
成行孟東野和薔薇歌仙機札札飛鳳凰花開七十有
二行不知皆用七十二取義何也


花色與香異

酒成碧後方堪飲花到白來元自香此趙丈德麟賦玉簪花詩也歷數花品白而香者十花八九也香至於菊則花白者輒無香花之黃八九無香至於菊則黃者乃始有香是亦所稟之異未易以理推者也

後山評詩人

後山詩評云詩欲其好則不能好王介甫以工蘇子瞻以新黃魯直以奇獨子美之詩奇常工易新陳無不好

者至荆公之論則云杜詩固奇就其中擇之好句亦自有數豈後山以體製論荆公以言句求之耶



春渚紀聞卷七